

46- اسلم رانا، ڈاکٹر۔ رنگ سنگ، 11۔

47- رشید امجد۔ شاعری کی سیاسی و فکری روایت (لاہور: دستاویز مطبوعات، 1993ء) 48۔

\* زیب النساء

## مڈھلی پاکستانی پنجابی غزل وچ حسن و عشق دا تصور

### Abstract:

*Ghazal is very charming genre of Persian, Urdu and Punjabi poetry, However, Punjabi poets paid a little attention to this genre, but with the passage of time, Ghazal attracted many poets and in very short span of time, a large number of poets wrote Ghazal. This genre is famous for the presentation of love and beauty. It also focuses the emotions of Hijr (Separation) and Visal (meeting). Early Pakistani Punjabi poets have also composed Ghazal. They discussed the emotions and feelings of lover for beloved. Moreover, some poets consider human love a stepping stone towards Divine love while others showed their passion only for Divinity. Some poets present the feelings of pure love, on the other hand a few poets revealed the desire for physical love. In this research article, an attempt has been made to explore all the above mentioned subjects of early Punjabi Ghazal with suitable examples.*

**Keywords:** *Ghazal, Charming, Urdu and Punjabi Poetry, famous, Presentation of Love Ghazal, Charming, Little attention, emotions of Hijr, feelings of lover, stepping stone, Divinity, revealed, Physical love, explore, Punjabi Ghazal, examples*

.....

ابوالعجاز حفیظ صدیقی اپنی کتاب تفہیم و تحسین شعروچ جذبہ عشق بارے انج رقمطراز ہیں:  
 ”بعض سطحی ذہن رکھنے والے اور بے تخیل لوگ یہ کہتے ہیں کہ عشق و جنوں کے سوا  
 شعرا کو کوئی دوسرا موضوع سوچتا ہی نہیں۔ ہزار ہا سال سے لوگ اسی موضوع  
 کو چٹے ہوئے ہیں۔

معتزین بھول جاتے ہیں کہ عشق کے ساتھ رقابت، حسد، رشک، استقلال،  
 ثابت قدمی، تحمل، شدائد و نوائب، انتظار، حسرت و حرماں، درد، فراق، سرور  
 وصول، عجز و نیاز، جرات اور وضع احتیاط، احترام و عقیدت، امید التفات، حسرت  
 دیدار، دعائے نیم شبی، گریہ سحری، اضمحلال انقباض، دروں بینی اور بیروں بینی، وفا  
 اور جفا، خارجی حالات کی ناسازگاری اور اندر کی دنیا کے ہنگامے، درس محبت کے  
 انقلابی مظاہرے غرض یہ کہ بے شمار جذبات، احساسات اور کیفیات بھی تو وابستہ  
 ہیں۔ عشق اکہرا جذبہ نہیں جذبوں اور کیفیتوں کا مصدرِ اعظم ہے۔ صاف لفظوں  
 میں چیلنج کیا جاسکتا ہے کہ معتزضو! کوئی دوسرا موضوع لاؤ جو اس قدر آفاقی ہو۔ اس  
 حد تک ابدی بھی ہو اور اس کی تکرار یکسانیت، بے لفظی اور بے کیفی پر منتج نہ ہو  
 ..... اور آخر میں یہ کہ عشق و جنوں کا موضوع ابدی ہے اور سدا بہار بھی“ (1)

ایس اقتباس توں ایہ گل ساہنے آؤندی اے کہ عشق صرف اک جذبہ نہیں۔ ایس جذبے دے  
 وکھو وکھ کچھ نہیں تے ہر کچھ دی وکھری اہمیت اے تے او سے نوں لکھ رکھ کے شاعران نے عشق دے رنگاں  
 نوں بیان کیتا اے۔ اُنج وی عشق دی واردات ہر بندے تے وکھرے طریقے نال اثر پاندی اے تے ہر  
 اک عاشق انوکھے تے وکھرے تجربے توں لگھدا اے کوئی عشق مجازی نوں عشق حقیقی دی پوزھی تصور کردا  
 اے تے کوئی حسن انسان نال نبرد آما اے۔

کلاسیکی پنجابی شاعری ول جہات ماری جاوے تے پتا لگدا اے کہ پنجابی شاعران مڈھ توں ای  
 عشق حقیقی نوں اپنی شاعری دا موضوع بنایا اے۔ بابا فرید توں شروع ہو کے ایہ سلسلہ اج تیکر جاری اے۔  
 خاص طور تے سلطان باہو دے ابیات یا سی حرفیاں وچ عشق نوں مرکزی حیثیت حاصل اے۔ ڈاکٹر  
 عصمت اللہ زاہد اوہناں دی شاعری دے موضوعاں بارے لکھدے نیں:

”سلطان باہو دی شاعری وچ عشق توں دکھ جنے وی دو جے موضوع آئے نیں اوہ  
 وی دراصل عشق دی ای اک شکل یا روپ آکھے جاسکدے نیں۔ عشق اک ایسا  
 جذبہ اے جیہڑا انسان وچ سچائی، صداقت، علم، حکمت، برداشت تے قربانی  
 ورگیاں صفتاں پیدا کر دیندا اے۔“ (2)

سلطان باہو دنیا تے آخرت دی کامیابی دارا ز عشق نوں سمجھدے نیں۔ اوہناں دے نیڑے عشق قربانی منگدا اے تے سچے عاشق اوہ ہوندے نیں جیہناں دی زندگی عشق دی بدولت بدل جاوے۔ فرماؤندے نیں:

’جیہناں عشق نہ حاصل کیتا اوہ دوہیں جہانیں مُٹھڑے ہو،‘ (3)

یا فیراک ہو رسی حرفی وچ آکھدے نیں:

اک حرف عشق دا پڑھن نہ جانن بھلے پھرن بچارے ہو (4)

سلطان باہو دے مطابق عشق بندے دے دل دی اکھ کھول دیندا اے تے اوہنوں صاحب بصیرت بنا دیندا اے جیہڑا بندہ عشق توں عاری اے اوہ بقول میاں محمد بخش:

جس دل اندر عشق نہ رچیا، کتے اوس تھیں چنگے

خاوند دے گھر راکھی کردے صابر بھکھے ننگے (5)

میاں محمد بخش ہو ریں وی جذبہ عشق نوں ڈاھڑی اہمیت دیندے نیں۔ اوہ وی سلطان باہو دی طرح عشق نوں دوناں جہانناں تے کامیابی دی ضمانت سمجھدے نیں تے نال نال ایہ خیال کردے نیں کہ عشق بندے نوں بہادر بنا دیندا اے:

عاشق موتوں ڈر دے ناہیں پتہ انہاں نوں لگا

موت نہیں اکوار مویاں نوں جھل آذت دا لگا (6)

میاں صاحب دا خیال اے کائنات دی تخلیق دا سبب عشق دا جذبہ اے۔ تے اوہ بندے خوش قسمت نیں جیہناں دے نصیب وچ ”عشق کرم دا قطرہ ازلی“ آیا اے۔ (7)

بلھے شاہ وی عشق دیاں کرامتاں من دے نیں تے عشق تے زور دیندے نیں۔ اوہ تے تھاں تھاں تے عشق مجاز راہیں عشق حقیقی تک اپڑن دے راز لوکائی اتے کھول دیندے نیں تے ظاہر تے باطن دی صفائی واسطے عشق نوں ضروری خیال کردے نیں۔

عشق دی نویوں نویں بہار

جاں میں رمز عشق دی پائی

بینا طوطا مار گوائی

اندر باہر ہوئی صفائی

چت ول ویکھاں یارویار

عشق دی نویوں نویں بہار (8)

پنجابی کلاسیکی روایت دے آخری شاعر خواجہ غلام فرید وی دوہے صوفی شاعراں وانگ عشق

نوں چوکھی اہمیت دیندے نیں۔ حقیقت شناسی دی دولت نال مالا مال خواجہ صاحب ایہدی وجہ جذبہ عشق نوں قرار دیندے نیں تے اوہ عشق دے جذبے پاروں فنا فی المرشد، فنا فی الرسول تے فیر فنا فی اللہ دی منزل توں پارنگھ گئے تے او تھے اڑ کے ”اوہ یکتائی“ یا ”وحدت“ دی حقیقت توں واقف ہوئے۔ عشق دی راہ وچ بھاریں بوہت اوکڑاں آندیاں نیں پر جے عشق سچا ہووے تے اوکھیاں راہواں عاشق نوں پھلاں دی تیج لگدیاں نیں۔ خواجہ صاحب فرماندے نیں:

عشق ہے ہادی پریم نگر دا

عشق ہے رہبر فقر دا

عشقیوں حاصل ہے عرفان<sup>(9)</sup>

ایہناں سارے صوفی شاعراں کول عشق تے تصوف دا جذبہ باہم ملدا دکھالی دیندا اے۔ پر جدوں اسیں وارث شاہ دا نظریہ عشق تکدے آں تے پتہ لگدا اے کہ اوہ عشق مجازی نوں وی عقل تے وجدان دا سبب قرار دیندے نیں۔ آکھدے نیں:

وارث شاہ فقیر دی عقل کتھے ایہ پٹیاں عشق پڑھائیاں نیں<sup>(10)</sup>

اوہ عشق نوں بے نیازی دی وجہ وی قرار دیندے نیں۔ اک سچا عاشق دنیا جہان تے آخرت توں بے نیاز ہو جاندا اے۔ اتھے عشق تے جنون باہم مل جاندا اے تے بندہ مجنوں بن کے ہر شے کولوں بے پرواہ ہو جاندا ہے۔ اوس نوں نفع نقصان دی کوئی فکر نہیں رہندی۔

عشق نال جنون لازم و ملزوم اے تے سارے کچھ جتھے شاعری دیاں باقی صغفاں وچ بیان کیتے گئے نیں او تھے غزل جیہدا وجود ہی حسن تے عشق دی پیداوار قرار دتا جاندا اے۔ کیوں واندی رہ سکدی اے۔ پاکستان بنن توں بعد غزل گو شاعراں نے عشق، حسن تے جنون نوں دکھرے دکھرے رنگاں وچ تے اپنیاں قلبی وارداتاں دے مطابق بیان کیتا۔ سچے عاشق کسے خطرے کولوں نہیں ڈردے تے نہ ہی اوہناں نوں موت دا کوئی خوف ہندا اے۔ اوہ عشق دی پرخطر وادی وچ سینہ تان کے داخل ہوندے نیں۔ جیویں کہ کشتہ ہوریں فرماندے نیں:

امرت پھل ہے لگ دا سنیا تیری ایس تلوار دی شاخ تا نہیں

ذرا ایس دی وگی دس سانوں، ذرا ایہدا سواد چکھا قاتل<sup>(11)</sup>

تے کدھرے کدھرے اوہ محبوب دی بے رخی دا ذکر انج کردے نیں:

اس جانیا جو ہجر دا آزار جھوٹھ موٹھ

کر چھڈیا ملاپ دا قرار جھوٹھ موٹھ

آون دا کر کے قول سکایا ای تانگھ وچ

لاراہی دتا تون میری سرکار جھوٹھ موٹھ<sup>(12)</sup>

کشتہ ہوراں دی غزل وچ عشق حقیقی دے نال نال عشق مجازی دارنگ وی اگھڑواں اے۔ کئی تھاداں تے اوہ مجازی محبوب ول ندرھک پیش قدمیاں کر دے دسدے نیں۔ اتھے اوہ تکلف دیاں ساریاں کندھاں ڈھا دیندے نیں:

بھھاں دے وچ تون مسکاویں میں اوہناں نوں چم لوں

جی تون شراب بناویں اوئی دیواں میں نیڑ<sup>(13)</sup>

عشق حقیقی دارنگ وی اوہناں دی غزل وچ چوکھا دسدا اے۔ اوہ اپنی حمدیہ غزل تے حمدیہ نعت وچ عشق دے لازوال جذبے نوں ایس کائنات دی تخلیق تون وی پہلاں دا جذبہ قرار دیندے نیں۔ سگوں اوہناں دا نظریہ اے کہ عشق کائنات دی تخلیق دا موجب بنیا تے فیروختی، غمی، دکھ، سکھ تے باقی جذبے وجود وچ آئے۔

پہلے عشق دا چمکیا نور ربی فیروختی تھیں کل جہان ہویا

ہویا عشق دے نال پھر رشک پیدا خوشی نال غم دا سامان ہویا<sup>(14)</sup>

چوں کہ صوفیاں دے نیڑے طریقت تے معرفت دے حصول واسطے عشق نبی لازمی اے تے ایہدے بغیر کوئی بندہ دعویٰ نہیں کر سکدا کہ اوہدا ایمان کامل اے۔ کشتہ ہوریں بھی رب دا وصال کرن تون پہلاں نبی دا دیدار لازمی قرار دیندے نیں کہ جیس نوں نبی دا جلوہ نصیب ہووے گا اوہ ای رب دا جلوہ کر سکدا اے:

مردہ دلاں نوں زندگی بخشدا اے ایسا مٹھرا نام ہے جان تیرا

جلوہ رب دا ہووے نصیب اوہنوں ہووے جیہنوں دیدار جانان تیرا

تیرے عشق دی اے داستان حضرت لوکاں سمجھیا اے قرآن جس نوں

جا کے عرش تے خیال تون نظر آیا درجہ بہت اچا عالی شان تیرا<sup>(15)</sup>

جدید غزل گو شاعر علامہ یعقوب انور دے والد محترم عبدالغنی وفا اپنے دور دے منے پر منے شاعر سن۔ ایہناں نے دو جیاں صنفاں دے نال نال غزل وی لکھی پر بد قسمتی نال اوہناں دیاں غزلاں زمانے دی دست برد توں بچ نہ سکیاں تے اوہناں دا بوہت سارا کلام اکھیاں تون اوپلے ہو گیا۔ امین خیال ہوراں اوہناں دیاں کچھ غزلاں ”وفا مہربانی کر کے آجاؤ“ وچ شامل کیتیاں نیں۔ عبدالغنی وفا دی شاعری کسے حد تک جدیدیت دا عنصر وی اپنے اندر رکھدی اے پر عشق، محبت، وچھوڑے تے ملن دے احساسات تون وی عاری نہیں:

کلیاں نہیں ایہ کسے دے وچ ماتم رند باغ اندر چپ چاپ بیٹھے  
 پھل نہیں ایہ وچ افسوس ساقی پھڑ صراحیوں مودھیاں ماریاں نیں<sup>(16)</sup>  
 بابائے پنجابی ڈاکٹر فقیر محمد فقیر ہوراں جتھے پنجابی ادب دیاں دوجیاں صفناں وچ طبع آزمائی  
 کیلتی اوتھے پنجابی وچ غزل وی لکھی۔ ڈاکٹر فقیر ہوراں مذہبی گھر وچ اکھ کھولی جہدی وجہ نال اوہناں دی  
 شخصیت تے مذہب دا داواہ اثر سی۔ رسول پاکؐ نال اوہ انتاں دا پیار رکھدے سن۔ بقول صدیق تاثیر:  
 ”اوہ رسول پاکؐ دے عشق دے پھنڈے ہوئے سن تے بھادیں ایہ رنگ  
 اوہناں دیاں نعتاں وچ بڑا اگھڑواں اے پر غزل وچ وی اوہناں دے ایہ خالص  
 دینی جذبے لشکاں مار دے دسدے نیں پر کتے کتے بلھے شاہ والی رمز تے ندھڑتا  
 وی بھے ماردی نظر آجاندی اے“<sup>(17)</sup>

خبرے کہڑے تصور نے چھڈیا نہ مینوں کتے بہن کھلون جوگا  
 نہ کوئی تیرے اسمان تے تھاں میری نہ کوئی تیری زمین تے تھاں میری  
 رستہ ازل جے ایس جہاں دا سی ایہ جہان سدھا رستہ ابد دا اے  
 اوہ وی چار دن دی ہے سراں میری ایہ وی چار دن دی سراں میری<sup>(18)</sup>  
 بھادیں اوہ اک مذہبی بندے سن تے اہناں دا دل اللہ تے نبیؐ دی محبت نال مخموسی پر اوہ کوئی  
 آسمانی مخلوق نہیں سن۔ اوہناں دے کالجے وچ وی دل دھڑکدا سی تے اوہ مجازی عشق و حسن دی اہمیت  
 توں منکر نہیں۔ غزل دے موضوعاں وچ عشق حسن نوں بنیادی حیثیت حاصل اے۔ ڈاکٹر فقیر ہوراں  
 ایس گل نوں انج بیان کیتا اے:

آوے نال خیال کسے دے جدوں خیال غزل دا  
 حسن جمال کسے دا بندا حسن جمال غزل دا  
 ہین قصیدے حسن اوہدے دے شعر فقیر غزل دے  
 رکھے کول کیویں نہ تحفہ یار سنبھال غزل دا<sup>(19)</sup>  
 ڈاکٹر فقیر ہوراں کول حسن تے عشق دے عامیانہ تصور دی تھاں اک بڑا سلجھیا ہویا تصور موجود  
 اے اوہناں کول حسن تے عشق دیاں پیچیدہ کیفیتاں تے نفسیات دا اظہار بڑے نونیکلے طریقے نال کیتا  
 گیا اے۔ اوہناں دا انداز بڑا سنہلیا ہویا اے تے اوہ حسن دی طاقت تے عاشق دے دل دا حال انج  
 بیان کردے نیں:

دیکھے حسن دے درس وچ بڑی واری لفظ بدل جانے سنے معنیاں دے  
 لبوں بلدیاں زبرد زبرد ہونا، نظراں ہونا زبرد زبرد جانا

چڑھتیل بدلے سمیاں دے موڈھیاں تے چڑھدی رہی اے  
 حسن واریاں دی دھر نے سوہنیاں نے جتھے پیراوتھے لا عاشقاں سراں دے ڈھیر جانا<sup>(20)</sup>  
 ڈاکٹر فقیر محمد فقیر دی غزل بھادویں حسن تے عشق دے محور دوا لے گھمدی اے پراوہناں غزل  
 وچ اک نویں روح پھونکی تے اوہنوں اپنے ماحول تے معاشرے نال ہم آہنگ کیتا تے اوہنوں حرکت  
 تے عمل نال واقف کرایا۔ ڈاکٹر فقیر ہوراں دی غزل دے اثرات جدید غزل گو شعراں تے چوکھے نظر  
 آؤندے نیں۔

محبت کرن والا اپنے محبوب دی توجہ چاہندا اے کہ محبوب اوہدی محبت تے خلوص دی قدر  
 کرے۔ عاشق دیاں محبوب نال توقعات بوہت ودھ جاندیاں نیں اوہ محبوب دی نظر کرم دا سائل رہندا  
 اے پراہو جے خوش نصیب عاشق گھٹ ای ہوندے نیں جیہڑے محبوب دی نظر کرم پٹھ آؤن تے  
 جیہڑے عاشق محبوب دے التفات توں محروم رہندے نیں۔ اوہناں دے ہونٹاں تے شکوہ آجاندا اے:

کسے نوں پھل کلیاں کسے نوں ہار دیندے او  
 خطا میتھوں ہوئی کہیڑی جے مینوں خار دیندے او  
 بٹھا کے غیراں نوں اولھے دلاں دے بھیت نہ دسو  
 تسیں دشمن دے ہتھیں ایہ پئے تلوار دیندے او<sup>(21)</sup>

فیروز دین شرف ہوراں دی غزل دے پرلے شعرا لیس گل دی گواہی دیندے نیں کہ عاشق  
 محبوب دی بے رنجی وی برداشت نہیں کر سگدے۔ رقابت دا جذبہ وی اوہدے اندر کٹ کٹ کے بھریا  
 ہوندا اے۔

عشق انسان دی سرشت وچ موجود اے ایہدی فطری کشش انسان دے اندر ذوق تے شوق  
 پیدا کردیندی اے۔ ایہدی چنگاری انسان دے من اندر سدا موجود رہندی اے۔ جدوں ایہ دھند چھٹ  
 جاندی اے تے عشق دا احساس فیر جاگ پیندا اے جیویں کہ عبدالمجید بھٹی ہوراں لکھیا اے:

سنتیاں پیٹھیاں دل دا بوہا کھڑک پیا اج فیر  
 اکھیاں دے وچ پیار پرانا رڑک پیا اج فیر  
 آساں ماریا دن لتھائے گوڑھیاں شاماں پییاں  
 بھجدا بھجدا دیوا ایویں بھڑک پیا اج فیر<sup>(22)</sup>

جیویں حسن تے عشق لازم و ملزوم نیں انج ای عشق تے رنج الم لازم نیں۔ عشق جدوں بندے  
 دے لہو وچ سرایت کر جاندا اے تو ایویں لگدا اے کہ اوہ عاشق دی جوانی تے طاقت کھا جاندا اے۔ عشق  
 داروگ بندے نوں کھوکھلا کر چھڈدا اے۔ ایہ اوہدے جو بن نوں خزاں وچ بدل دیندا اے جیویں کہ استاد

جوہر آکھدے نیں:

جوہر عاشق تے ہاسا کیتا رہیا نہ رنگ جوانی دا  
پت جھڑواٹوں جھڑ گئے سارے رنگے روپ شنگاراں دے (23)  
انج ای غلام صوفی تبسم صاحب وی عشق تے غم نوں لازم و ملزوم سمجھدے نیں۔ عشق دی راہ  
وچ ڈاٹھیاں اوکڑاں آؤندیاں نیں تے کئی واری عاشق ایہناں اوکڑاں تے الجھناں توں نڈھال  
ہو جاندا اے۔ اوہنوں کسے طرح چین نہیں آؤندا اوہ ماضی دیاں گلاں یاد کر کے جھور دار ہندا اے تے  
نالے اپنے اج دے دکھاں دا ماتم کردا اے۔

ساڈے عشق دے چمکدے لیکھاں تے ڈاڈھے غم دیاں سیاہیاں ڈلھ گئیاں  
جیہڑیاں حُسن تیرے چمکائیاں سن، اوہ چاننیاں راتاں رُل گئیاں  
ایس عشق نمانے دے دھاگے دیاں کچھ ایڈ اولیاں گنچھلاں سن  
کچھ کھولدے کھولدے ہور پینیاں کچھ پیندیاں پیندیاں کھل گئیاں (24)

اُپر دیتاں گئیاں مثالاں توں حیاتی عشق و حسن تے اوہناں نال جڑے دوہے جذبیاں دی  
داستاں جا پدی اے ایہناں جذبیاں دے مختلف روپ تے دکھریاں دکھریاں پرتاں نیں۔ ایہناں وچ  
بنیادی چیز عشق تے محبوب نوں پان دی سدھر اے جیہڑی کئی جذبیاں تے احساساں نوں جمدی اے۔  
کدی ملن دی آرزو بن دی اے تے کدی التجاء دی شکل وچ سائہنے آوندی اے، کدے امید دلاوندی  
اے تے کدھرے حسرت تے بے کسی دارنگ اختیار کردی اے، کدی وارننگلی یا بے قراری تے بے تابنی  
بن جاندی اے تے کدی عاشق شکوہ شکایت کردا نظر آؤندا اے، کدی محبوب واسطے جان تیکر وارن دا  
عندیہ دیندی اے۔ عاشق بعض اوقات اپنے دکھ درد تے غماں نوں شعراں راہیں بیان کردا اے تے  
دکھاں دے باوجود ثابت قدمی تے مستقل مزاجی ظاہر کردا اے۔ عاشق ایہناں سارے جذبیاں توں اڈ  
سب توں ودھ وصال دامتہنی تے ہجر توں شاکی ہوندا اے۔

محبوب توں دوری عاشق نوں کسے قیمت تے گوارہ نہیں ہوندی تے اوہ محبوب توں دور ہو کے  
ہر ویلے بے قرار رہندا اے، اوہ محبوب دا دیدار کرن واسطے تڑفدا اے۔ اوہنوں کسے پل چین نہیں آؤندا  
ایسے طرح وصال دیاں گھڑیاں عاشق نوں اوہ خوشیاں تے سرشاری عطا کردیاں نیں جیہدے پاروں  
غزل کئی جذبیاں توں آشنا ہوئی۔ ایہ جذبے صرف مجازی محبوب واسطے ای نیں سگوں محبوب حقیقی دے ملن  
دی تڑپ تے ہجر دے غم دی وجھوں صوفی نوں وی بے قرار رکھدے نیں، سچا عاشق رورو کے محبوب نال  
وصال دی دعا کردا اے:

بجر تیرے وچ رورو کے اکھیں کل تک گڑے ورھانندیاں سن  
آہاں دے چنگیاڑے بن کے برسن گے انگیاڑے اج (25)  
ڈاکٹر محمد فقیر وی ایس درد جدائی نوں لفظاں راہیں بیان کردے نیں:

درد جدائی دے پئے رڑکن سینے دے وچ تیراج  
گھر دیاں اکھراں دے وچ ڈھلکے تیری تصویر اج  
رچیاچیا سوچاں وچ ایہ درد وچھوڑے تیرے دا  
اثر دلاں تے کردی اے میرے شعراں دی تاثیر اج (26)

عاشق محبوب نال ملن دی آس تے جیوندا اے تے اکثر انج ہوندا اے کہ محبوب دی نظر کرم کسے  
ہورتے ہوندا اے جیہدی وجہ نال رقابت ورگے جذبے پننگدے نیں تے جے محبوب عاشق ول مائل  
ہو جائے تے فیر عاشق دی خوشی دا کوئی ٹھکانہ نہیں ہوندا۔ فیر اوہ اپنے نصیبیاں تے رشک کردا اے کہ حسین  
و جمیل محبوب اوہدے ول ملتفت اے یعنی کہ رشک تے حسد دے جذبات دی عشق دے ہی وکھرے  
وکھرے رنگ نیں۔ ایہ وی دیکھیا گیا اے کہ عاشق رقیب دی قسمت تے رشک کردا اے کہ اوہدے  
رقیب دی قسمت چنگی اے کیوں جے اوہنوں اوہدے محبوب دی محبت تے وصال دی خوشی حاصل اے:

پیا ویریاں نال اے گوڑھ تیرا سانوں ویکھ کے گھوریاں وٹائیں  
دن اسان نے تے ویکھنے سن ایہ وی، ایہ وی اے جن اک خدا رنگ (27)

گل کیہ پئی عشق تے حسن غزل دے خمیر وچ ابتدا توں موجود سن تے اج وی ایس موضوع  
تے غزل گوئی کیتی جا رہی اے تے کیتی جاندی رہوے گی۔

☆☆☆

حوالے:

- \* لیکچرار، پنجابی، شعبہ پاکستانی زبانیں، علامہ اقبال اوپن یونیورسٹی سیکٹر 8-H اسلام آباد
- 1- صدیقی، ابوالعجاز حفیظ۔ تفہیم و تحمین شعر (لاہور: سنگت پبلشرز، 1996ء) 204، 205۔
- 2- عصمت اللہ زاہد، ڈاکٹر۔ ادب سمندر (لاہور: اے ون پبلشرز، 1997ء) 52۔
- 3- سلطان باہو۔ ابیات باہو، مرتب ڈاکٹر سلیم رانا (لاہور: عزیز پبلشرز، 1988ء) 444۔
- 4- سلطان باہو۔ ابیات باہو، مرتب ڈاکٹر سلیم رانا، 171۔
- 5- میاں محمد بخش۔ سیف الملوک (لاہور: خزینہ علم و ادب، سن 30)۔
- 6- میاں محمد بخش۔ سیف الملوک، 280۔

- 7- عصمت اللہ زاہد، ڈاکٹر۔ ادب سمندر، 230۔
- 8- بلھے شاہ۔ آکھیا بلھے شاہ نے، مرتب آصف خاں (لاہور: پنجابی ادبی بورڈ، 1999ء) 224۔
- 9- خواجہ غلام فرید۔ دیوان خواجہ فرید (لاہور: فیصل ناشران، 2006ء) 383۔
- 10- سید وارث شاہ۔ ہیر مرتب پیر ستر عبدالعزیز (لاہور: پنجابی ادبی اکیڈمی، 1964ء) 83۔
- 11- کشتیہ، مولابخش۔ دیوان کشتیہ، ایڈیٹر محمد افضل خاں (لاہور: بک شاپ، س ن) 88۔
- 12- کشتیہ، مولابخش۔ دیوان کشتیہ، 45۔
- 13- کشتیہ، مولابخش۔ دیوان کشتیہ، 111۔
- 14- کشتیہ، مولابخش۔ دیوان کشتیہ، 1۔
- 15- کشتیہ، مولابخش۔ دیوان کشتیہ، 3۔
- 16- وفا، عبدالغنی۔ شعر مشمولہ پنجابی ادب دارتقا از ڈاکٹر انعام الحق جاوید (لاہور: الفیصل ناشران کتب 2015ء) 360۔
- 17- صدیق تاثیر۔ ڈاکٹر فقیر محمد فقیر ہوراں دی پنجابی غزل، مضمون مشمولہ باراں برج پنجاب دے، مرتب غلام مصطفیٰ بسمل (لاہور: پلاک 2002ء) 94، 95۔
- 18- صدیق تاثیر۔ ڈاکٹر فقیر محمد فقیر ہوراں دی پنجابی غزل، 95۔
- 19- صدیق تاثیر۔ ڈاکٹر فقیر محمد فقیر ہوراں دی پنجابی غزل، 97۔
- 20- صدیق تاثیر۔ ڈاکٹر فقیر محمد فقیر ہوراں دی پنجابی غزل، 107۔
- 21- شرف، فیروز دین۔ نورانی کرناں (لاہور: مولابخش کشتیہ تاجران کتب 1951ء) 198۔
- 22- عبدالمجید بھٹی غزل مشمولہ کھوج مسلسل (شمارہ 20 جنوری۔ جون 1989) 49۔
- 23- استاد جوہر۔ مشمولہ پنجابی غزل دارتقا مرتب غلام مصطفیٰ بسمل (لاہور: پلاک 1996) 30۔
- 24- صوفی غلام مصطفیٰ تبسم۔ نظراں کردیاں گلاں (لاہور: پاکستان پنجابی ادبی بورڈ 1988) 71۔
- 25- کشتیہ، مولابخش۔ دیوان کشتیہ، 21۔
- 26- فقیر محمد فقیر، ڈاکٹر۔ غزل مشمولہ باراں برج پنجاب دے مرتب غلام مصطفیٰ بسمل (لاہور: پلاک 1996ء) 202۔
- 27- کشتیہ، مولابخش۔ دیوان کشتیہ، 94۔